

東  
華  
續  
錄

東華續錄

咸豐九十六

臣王先謙敬編

臣陶濬宣恭校

八月壬戌朔諭軍機大臣等德楞額等奏自請帶兵赴通等語據稱山東軍務雖當江北喫緊之際較之京通輕重懸殊商令哈勒洪阿暫紮韓莊德楞額親帶兵勇一千名星馳赴通聽候調遣山東韓莊一帶防務稍鬆已諭令德楞額准其帶兵赴通俟該副都統到時著僧格林沁等體察情形如大營可無需此項馬隊卽令德楞額屯紮附近通州一帶或繞截前途或鈔擊後路由該大臣等自行酌量調派可也正在寄諭間據載垣等奏到在通已與巴夏禮威妥瑪接晤言尙馴順呈出在津時與桂良等議定續增條約八款惟天津通商一款極有關繫第桂良等業經允許難於翻

悔當卽給與照會俟額爾金到通卽行蓋印畫押再行進京換約其所帶隊伍悉駐張家灣以南五里外不再前進一寸該大臣等見既准額爾金抵通其照會內有隨帶弁兵約照一千之數其餘紮營總於張家灣以南五里之外等語著僧格林沁仍嚴兵以待於額爾金來通時除約定千兵以外如有任意續來仍應攔阻額爾金既隨帶弁兵千數來通將來葛酋定議時所帶弁兵亦必照此數目總須嚴密偵訪尤恐巴夏禮等貌爲馴順其中仍有叵測該大臣諒必能籌畫精詳萬無一失也將此由五百里諭令知之○諭昨據德楞額奏請分兵赴通助剿已諭令該副都統准帶兵勇千名馳赴通州並諭知僧格林沁於附近通州一帶酌量調派本日據傳振邦奏穎亳大股捻匪傾巢而出計有十數萬眾由永南沿滄而東襲破練圩兩處圍攻滄南軍營雖經擊退其勢甚熾請飭

河南山東一體嚴防等語復經諭知德楞額察看情形能否帶兵  
赴通自行斟酌辦理矣再本日據托明阿等奏西安馬隊二千三  
百名並商雒等處步隊一千五百餘員名配帶軍火等項自七月  
十二至二十一二等日業已渡河趨出陝境此次馬步各隊計已  
陸續可到著卽將續調之察哈爾馬隊後起官兵一千名分撥勝  
保軍營令於由通入京各要隘酌量布置以爲該大臣等後路援  
應見在該大臣等軍營兵共有若干名及所調各省官兵已到營  
者共有若干名著將數目查明具奏○癸亥傳振邦奏永境捻股  
勾結西路援賊北竄永碣經臣派撥勁旅駐紮黃口與蒙村苗村  
等營聯絡嚴防仍督南路大軍照舊攻圩賊技既窮折衝韓村一  
帶伺間滋擾臣督飭各營隨時擊退復念袁徐兩圩附近積潦成  
湖難以進攻賊亦堅匿不出惟聞沙河一帶漏網餘匪歸併西路

若不乘勢進剿恐日久又生波折因飭知府童維翰等於六月三十日調齊團練會合馬步官兵直趨蒙境將小澗集賊圩擊破徑取蒙城正西之西洋集該處賊圩叢密爲蒙亳老巢門戶防守極嚴七月初三日大軍進攻三戰三捷攻破賊圩十四座殺賊三千餘人賊勢窮蹙詎潁亳大股捻匪因渦淝漲溢賊圩被淹捻首姜台凌劉狗等糾集數百圩之眾各帶家屬輜重傾巢北竄圖掠完善之區適捻首劉添幅余麻和等潛往句結兼有張逆之兄張閔行新脅亳永一帶飢民爲之前驅於是五旗之賊計有十數萬眾欲就食滄南由永南沿滄而東徑至童亭襲破練圩兩處十六十七等日遂至張家埠口將滄南官軍營盤圍住冀斷前敵餉道各營出擊屢勝奈賊愈集愈多相持不退十九日臣督同苗沛霖率隊前進與賊接仗鏖戰三時之久殺賊四五百名衝入重圍將遊

擊王清泰四營隊伍接出暫就南岸紮駐二十日賊糾大股十數萬拌死來撲我軍據險列陣屹立不動相持時許田在田自率馬軍突由兩翼壓下臣亦揮步隊奮力齊上兵勇一以當百將賊隊衝爲四路追殺四五里該匪大股接應回拒適南路苗沛霖帶隊趕到我軍勇氣百倍南北夾攻賊益不支均向西南潰遁兵練會集一處追至清水溝以西前後殺賊甚多焚毀賊壘五座割取首級一千餘顆始行收隊二十一日苗沛霖親統各練由歸正廟西北進剿該逆大股出迎兇悍異常我軍分列五隊三面兜擊將賊壓退適劉蘭馨張建猷等帶隊由小澗鈔賊之西臣等分撥馬隊會同李玉田等由東路繞北夾擊賊眾披靡狂奔我軍分投追殺斃賊三千餘人踏毀賊壘五座生擒著名大擒首余麻和韓四仁等二名其餘小擒首以百數計查該賊十數萬之眾傾巢而來經

我軍奮力攻剿立挫兇鋒所慮該匪自恃人眾未免旁竄爲患除飭各路嚴防外相應請旨飭下慶廉德楞額分飭永城與山東各路防兵一體加意堵剿毋稍疏虞 上諭軍機大臣等傳振邦督飭各軍痛剿兇鋒惟賊勢眾多拌死狂奔尤虞旁竄紛擾著慶廉德楞額各飭永城與山東各路防兵一體嚴防並速探賊蹤所向與傅振邦等軍分投接應毋分畛域聯絡堵剿殄除羣醜保全完善地方昨有旨准德楞額所請帶兵勇一千赴通見當捻勢縱橫東防又加喫緊著德楞額體察情形緩急斟酌行止毋致顧此失彼將此由六百里各諭令知之○予安徽陣亡副將劉蘭馨等祭葬世職○甲子以候補三品京堂勝保爲光祿寺卿○乙丑以英佛二國人偪近通州稱欲帶兵入見嚴飭統兵大臣決戰近畿州縣整團阻截降旨懸賞通諭中外○諭軍機大臣等前因江北防

務緊要楚軍未能分撥諭令官文胡林翼調派馬步兵勇千名交都興阿統帶啟程前往江北到防以後於淮徐等屬抽練勇丁藉資防剿茲據李若珠奏金陵逆匪見在製造礮船並擄取船隻意圖北竄其由丹徒小河口等處出竄賊匪雖經各艇船將弁先後擊退惟艇師單薄亟盼上游援師等語見在會秉忠所帶之長龍船全數派往赴滬下游各起艇師爲數無多設金陵之逆擄船下竄丹徒等處再有逆眾橫趨則江北一帶更形喫重著官文胡林翼迅將前調馬步兵勇一千名挑選精壯配齊軍裝器械由都興阿統帶迅赴江北力籌堵剿至以楚師營制訓練淮徐勇丁實爲見在切要之圖著都興阿仍遵前旨與會國藩會商趕緊辦理以冀練成勁旅正在寄諭間據都興阿奏楚勇未能遠征擬調吉林馬隊一起及見有馬隊已咨行官文胡林翼催調等語著官文胡



林翼迅將此項馬隊卽飭赴前路都興阿軍營以便該將軍卽日統帶啟程馳赴江北認真剿辦保全完善之區是爲至要將此由六百里各諭令知之○諭前據張芾奏浙江賊眾突犯廣德江長貴親督馬步各隊出城馳剿所向披靡該逆復糾眾回撲江長貴與米興朝登陴督戰及賊眾圍城江長貴猶引親軍數十人拔關而出與賊死戰手刃數賊究因援軍未到以致州城失陷江長貴突圍退至安吉等語已降旨將該署提督革職畱任茲據瑞昌等奏廣德州失守情形與張芾所奏大略相同惟所稱該逆竄入廣德東南二門時江長貴在南門不知何往以致米軍退走與張芾前奏江長貴登陴力戰各情迥不相符江長貴自派援江蘇等處節節潰退此次統領廣防所部有七千餘人並不爲單竟不能固守一兩日以待援兵實堪痛憾著瑞昌來存王有齡將江長貴此

次如何臨陣退縮棄城不守及張芾前奏因何不符之處據實查明參奏毋稍徇隱米興朝赴援不力此次復退至四明前已諭會國藩奏參該將軍等奏請免議之處著毋庸議所擬仍由民間辦理防堵各節卽著瑞昌來存王有齡等認真激勵迅速舉行以收實效將此由六百里諭令知之○諭本日據載垣穆蔭奏巴夏禮等已帶四十餘人抵通州呈出照會有互換和約時須將國書親呈御覽之語經載垣等再三駁詰堅執如故此係國體所存萬難允許該王大臣可與約定如欲親遞國書必須按照中國禮節拜跪如儀方可允行設或不能止宜按照米俄兩國之例將國書齎至京師交欽差大臣呈進俟接收後給與璽書亦與親遞無異見在撫局將有成說不值因禮節而決裂設固執前說惟有與之決戰其隊伍敢過張家灣以北卽著該王大臣一面趕緊知照僧格

林沁等督兵勦辦該王大臣卽一面回京毋得泥於議撫致誤戰  
局至劫去天津府知府石贊清一節該王大臣卽行文知照額爾  
此係中國最得民心之官猝被爾國羈留士民憤恨異常洵欲  
鬪中國亦斷難禁止見當兩國互換和約之時豈宜有此務令孟  
姓夷酋迅速以禮送還以全和好而弭事變該王大臣約定各條  
務須於在通時與之定準切不可有俟到京後再行商酌之語言  
詞務須斬截以昭中國信義勿得稍有游移○諭載垣穆蔭奏英  
夷所請各條已皆允許巴夏禮復邀同佛夷巴士達美里登來通  
呈出照會內有換約時所有國書須親呈御覽之語此條萬難允  
許已知照曾格林沁等嚴兵以待等語似此忽生枝節如載垣等  
再加開導不執前說自不至因此決裂諭令該大臣等如果遵天  
朝禮節拜跪呈遞國書自屬可行否卽仍應援照米夷來京呈遞

國書辦理誠恐因此條不允仍帶夷兵過張家灣著僧格林沁等  
卽行痛剿不必再爲顧惜撫局該大臣等務嚴兵以待毋致倉卒  
或失事機本日據載垣等呈遞恆福咨文內稱該夷因聞大兵欲  
鈔其後路將天津府知府石贊清劫畱營中不放士民憤懣異常  
洶洶欲鬪有不容並立之心已諭載垣等給與照會令迅卽放回  
並諭恆福等密爲布置一聞張家灣開仗之信卽令民團進攻昨  
有旨令勝保帶兵紮定福莊茲據載垣等奏兵力不宜過分請將  
勝保所帶全軍飭令卽赴僧格林沁大營等語著僧格林沁等體  
察情形如尙須厚集兵力卽將勝保所帶全軍飭赴僧格林沁大  
營以備剿擊或於所帶之兵酌量分調若干前往若前敵之兵已  
敷攔剿勝保一軍仍令紮定福莊以爲後路該大臣等軍營見共  
有兵若干名及所調各省官兵已到營者共若干名前經諭令查

明數目具奏務於卽口遵查迅速奏聞可也○諭據載垣穆蔭奏  
巴夏禮堅欲撤退僧格林沁張家灣之兵該王大臣與之剖辨掉  
頭不顧驟馬逃去該大臣立卽知照僧格林沁與之開仗大兵獲  
勝巴夏禮業已就擒各等語著恆福卽會同焦祐瀛等乘此聲威  
激勵團勇痛加勦洗其津通一帶沿途各民團一體號召協助官  
軍並懸重賞鼓勵衆心迅卽調度勿誤事機是爲至要○諭僧格  
林沁等奏夷隊來撲我軍退至八里橋一摺僧格林沁見扼八里  
橋截住夷兵前進之路諒能振起軍心務須設法更番搗戰使其  
不得休息恐該夷調齊大隊轉來撲犯致落後手尤須防其鈔襲  
後路或由通州城內衝出撲我八里橋之後取道北犯勝保之兵  
應令紮余家衛以備截擊來京要路其所帶僅止步隊見有察哈  
爾馬隊一千名如老弱不堪衝突卽可將其兵丁守營另選精兵

用其馬匹以利馳逐事機萬緊著僧格林沁瑞麟會同勝保妥籌  
戰勝機宜務期一鼓作氣勦力同心實殷厚望○丙寅諭內閣戶  
部奏在籍藩司勸捐軍餉未經報銷請獎請嚴查究辦一摺江蘇  
在籍前任湖南布政使王藻自咸豐三年在本籍通泰一帶辦理  
捐輸聲名狼籍眾怒沸騰該員經手所收捐項不下二百餘萬作  
何動用既未報銷又未呈報請獎等語該部既查無奏咨給獎案  
據卽該員本身所捐銀二萬四千兩亦難保無將他人捐項作爲  
己貲冒邀獎敘情弊著王藻齡會同喬松年嚴密確查並提隨同  
該員勸捐各紳士訊明通泰等處捐項數目乾沒若干實據卽行  
奏明請旨並飭令該員王藻先行交出銀三十萬兩充餉其餘仍  
照數分限嚴追如該員恃符狡賴不卽完繳卽行參革嚴追查鈔  
家產變抵按律治罪以爲侵蝕捐項者戒○諭軍機大臣等周天

受奏甯軍續獲勝仗請飭催餉援一摺甯國官軍自六月十七日以後續獲勝仗力保郡北糧道並攻克西南兩路逆卡逆壘見在敗匪負隅鄰疆不守甯國孤城困守五十餘日餉道益梗設有疏虞關繫皖南全局前諭會國藩救援甯國該大臣以兵將未齊須俟七八月間李元度等陸續到徽方能進剿目下帶兵各員諒已趕到著卽派撥兵勇馳援甯郡毋再遲誤周天受仍著就見在兵力固守待援並聯絡地方紳團相機擊剿勿稍疏懈見在皖南軍務歸會國藩辦理所有湖南等省協餉並著該大臣自行嚴催見在廣德克復士氣奮興周天受惟當激勵士卒力解城圍是爲至要將此由六百里各諭令知之○諭戶部奏酌提各省漕折銀兩採買糧石以實倉儲一摺京倉爲根本至計兵民口食攸關亟應廣爲籌畫見在江西湖南湖北軍務肅清閭閻安業所有應徵各

款自可照舊徵收著官文胡林翼文格毓科將江西漕折銀提四十萬兩湖南湖北漕折銀各提十萬兩務於年內一律解京並將起解銀數日期先行奏報奉天山東二省前經諭令籌辦推廣捐收糧米如何章程著玉明文煜迅速妥議具奏毋稍延緩將此由六百里各諭令知之○玉明奏金州復到夷船多隻仍飭濱海嚴防○賞安徽在籍翰林院編修宋夢蘭侍講銜督辦皖南團練事宜○命山東在籍己革閩浙總督劉韻珂廣東巡撫黃恩彤前任江蘇巡撫傅繩勛等分辦本省團練○曾國藩奏臣接奉四次諭旨飭令迅速進兵查目下軍情自以規復蘇常爲要而皖南進兵必須能保甯國能復廣德乃有進兵東下之路則必以急援甯郡急攻廣德爲要二者力不能兼辦則又以專救甯國爲要然由祁門徽州而入甯郡須分走旌德涇縣石埭等處見已一片賊氛必



須節節掃蕩以分賊勢而清後路則欲援甯郡又以先勦旌涇石  
埭三縣爲要臣自聞甯國被困之信續撥銀五千兩由張芾派弁  
轉解因無路可達中途折回臣催調各軍急切難來日夜徬徨莫  
知所措茲據鮑超稟稱已於七月初五日行抵宜昌府張運蘭稟  
稱十一日行抵江西省計七月底均可到祁門臣擬俟該鎮道等  
到齊派鮑超率霆營六千由黟縣以攻涇縣又飭李元度先往廣  
信布置防務仍由徽州旌德前進必俟涇旌石三路肅清直抵甯  
郡然後臣軍之立腳始定皖南之局勢始安皖南安則浙江亦安  
而蘇常亦有可圖臣擬俟八九月間大戰數次察接仗之利鈍定  
入蘇之遲速目下兵力未齊上不能慰聖主宵旰之憂下不能  
答蘇人雲霓之望此臣之寸心負疚惶悚無地者也至龐鍾璐所  
稱由浙至蘇先復吳江此張玉良一路之事必先克復嘉興然後

能達吳江由滬至蘇先復崑山此薛煥一路之事必先克復松太然後能進崑山由江北至蘇取道常熟此李若珠一路之事必先分兵過江然後能趨常熟此三路者方自保之不暇未必能遽圖進取若臣軍南赴吳江仍須由皖南下手北赴常熟仍須由淮揚下手行軍本有次第賊情時有變更既難僥倖於不可必成之功又豈敢臆斷於不可逆料之事臣惟有嚴督皖南諸軍速戰一日速進一步以期仰副 聖廕再准張芾函稱廣德州城於十四日寅刻收復賊向建平東壩溧陽竄去周天受來信甯廣仍爲賊阻又探有賊二萬由池州竄併石埭臣查廣德收復暫由浙軍戍守俟左宗棠新軍一到由廣德先入蘇境目下救援甯國仍由石埭涇旌前進報聞○丁卯以雲南楚雄廣通元謀府縣等城被賊竄陷張亮基徐之銘下部議處予陣亡知府楊觀等祭葬世職○戊

辰諭內閣載垣穆蔭辦理和局不善著撤去欽差大臣恭親王奕訢著授爲欽差便宜行事全權大臣辦理和局○諭軍機大臣等本日據軍機大臣呈遞勝保信函知前路接仗失利大營退紮八里橋勝保已受重傷撫局難成載垣穆蔭辦理不善已撤去欽差大臣見派恭親王奕訢前往督辦和局本日明發諭旨一道僧格林沁等卽宣示夷人令其停兵待撫恭親王奕訢未便與夷人相見候其派委議撫之人或恆祺或藍蔚雯等到後再與面議該大臣等仍當嚴陣以待堵其北犯務須阻遏兇鋒以顧大局發去照會二件卽派員持交英佛二酋可也○內廷王御前大臣等奏見在撫局未成請將巴夏禮暫時羈畱以爲轉圜地步報可○己巳上詣 安佑宮行禮以秋獮木蘭自圓明園啟鑾 皇長子隨駕○瑞麟勝保奏八里橋與夷接仗勝保受傷得旨勝保著賞假

調理瑞麟著毋庸來園卽在城外督率伊勒東阿接應隨同僧格林沁截擊○庚午諭內閣留京辦事王大臣著派豫親王義道大學士桂良協辦大學士戶部尙書周祖培吏部尙書全慶義道全慶著仍在禁城周祖培著仍在外城桂良著仍在城外○諭軍機大臣等前有旨令景瀄特普欽等各撥兵一千名獵戶一千名前赴通州一帶交僧格林沁等調遣昨據景瀄等奏派兵一千名業已啟程見在夷氛逼近京城朕於本月初八日巡幸木蘭所有前調吉林黑龍江兵丁如已進山海關卽著春佑迅速知照帶兵官飭令折赴熱河護駕毋庸前赴通州再熱河行宮及一切供應著春佑卽飭該總管及地方官妥爲打掃豫備是爲至要將此由五百里諭令知之○命大學士賈楨協辦大學士周祖培兵部尙書陳孚恩刑部尙書趙光在外城辦事○壬申勝保奏請飛召外援

以資夾擊諭會國藩袁甲三慶廉翁同書傅振邦派兵剋日赴京  
○是日駐蹕巴克什營行宮○癸酉僧格林沁等奏佛國通事愛  
喜略欲輕騎進城與恭親王會晤心懷疑慮須有確據方肯進城  
洋人已將石質清送回巴夏禮須加以恩禮妥爲看待以爲轉圜  
地步見在恆祺藍蔚等並未前往即使洋人有心就撫亦無由  
轉機洋人各處哨探撫局宜迅速辦理不可稽延奏入命恭親王  
給與照會擇城外適中之地派恆祺等前往與愛喜略會晤由恭  
親王斟酌辦理○命張祥河桑春榮董醇飭辦順天西北兩路團  
練○以瑞昌爲山西按察使由冀甯道遷○是日駐蹕兩間房行宮○  
甲戌予江蘇陣亡左贊善趙振祚祭葬世職○是日駐蹕常山峪  
行宮○乙亥諭內閣薛煥奏嘉興軍營將士請畱獲罪大員督剿  
等語據稱副將吳再升等稟稱各營兵丁因已革總督何桂清前

曾籌畫軍糈接濟兵食願令該革督赴營督剿俟克復蘇州再行  
赴京伏罪何桂清身任封疆大吏棄城不守以致江蘇全省糜爛  
厥咎甚重著辭煥仍遵前旨迅卽派員押解來京聽候審辦該將  
士等請留軍營督剿之處著不准行○命署江蘇臬司候補道江  
清驥接辦江南糧臺○刑部尙書瑞常等奏添派大員巡守地面  
得旨巡守地面著添派成琦孟保○予江南陣亡副將舒祥等江  
蘇陣亡道員史保悠等祭葬世職○是日駐蹕喀拉河屯行宮翼  
日如之○丙子毛昶熙奏臣遵辦河南團練事宜當與撫臣慶廉  
面商以團練之要總宜就地辦團就團練丁令以八成自守以二  
成出戰造具花名清冊委派官紳分管操練一有警報立即酌調  
防剿隨地有團卽隨地有丁無調紮之弊有調紮之利乃撫臣堅  
執成見總謂調紮之勇甚爲可恃各縣雇勇之費不過抵正供十

之二三不至累民無論抽丁鄉團總須調營自備資斧分派駐紮等語臣再四婉商鄉團辦成之後足資防剿不必常川調紮撫臣仍不聽從夫使此項雇勇果爲可恃果不累民臣何敢稍存偏見無如勇不足恃費尤累民皆有明證確據敬爲我皇上陳之查撫臣派紮民勇以營郭十字河宋集高辛集等處爲最要之地乃自七月二十四日後賊由營郭附近竄入豫境其地駐紮民勇六百名不聞能堵賊也由營郭竄至宋集附近地方其地駐紮民勇三千四百名不聞能堵賊也又西至高辛集十字河等處撫臣所派將官與賊接仗失利退回府城兩處駐紮民勇未聞能助官軍也賊遂西竄柘城擾鹿邑撲太康圍陳州撫臣所遣官兵節節尾追陳州調紮之勇未聞有堵禦者其分股竄擾府城東北蔡道口陳家集馬牧諸處盤踞數日肆行焚掠從容回巢大營旣未派一

兵一勇前往剿捕而賊經過之會亭驛鄧縣城皆有民勇駐紮亦未聞有堵禦者致令捻匪縱橫出沒如入無人之境見在西股竄至西華商水等處數百里內慘遭荼毒臣親在宋郡聞見皆眞乃撫臣猶以民勇爲可恃此臣之所不解者一也撫臣自七月初旬聞賊有內擾之信卽由高辛集退回府城至今不出鎮道大員隨居城內其城外營盤幾同虛設幫辦軍務關保亦安居鹿邑縣城邊界各防所僅派微末員弁帶兵千餘幫同民勇防守夫以受恩深重之員身擁重兵猶不肯親駐邊界而謂民間雇覓之勇零星散布遂可恃爲藩籬之固此臣之所不解者二也查歸德一府調紮民勇撫臣全委知府傅壽彤辦理而該府辦事有名無實聞每月在糧臺領餉入千兩雇勇二千名專資守城乃捻匪近城臣督同紳士登陴巡視該府所募之勇每門止有三十名其餘皆係虛



冒夫撫臣同居府城尙不能覈實辦理而謂其邊界所辦之防丁

爲可恃此臣之所不解者三也查陳州一屬練丁皆調邊境內地

一無可恃此次賊匪內擾奔突蹂躪毫無闌阻是防邊本以衛內

地而反以害內地此臣之所不解者四也至謂抽丁調防不至累

民百姓所出不過抵正供十之二三臣細爲覈算卽如歸德所屬

之商邱一縣派勇一千二百名每名民間日給口糧制錢二百文

統計一年需用八萬四千餘貫加以器械火藥運費不下十萬以

銀價合計約值銀七萬兩商邱正項地丁不及五萬兩而撫臣謂

不過抵正供十之二三此臣之所不解者五也查歸德大營兵勇

見在不及二萬藩司竭力籌餉歲需百餘萬而兵勇猶以口糧欠

缺怨聲載道乃欲令歸陳凋敝百姓常川雇勇二萬五六千名且

謂民力可支樂於從事其誰欺乎此臣之所不解者六也伏查歸

陳二府百姓勇敢素著聞勦賊則踊躍爭先聞駐防則憚於從事  
蓋以勦賊時日可計易於裹糧駐防則動輒經年難以籌餉誠如  
原議隨地結團隨團選丁加以訓練使皆知戰守之方則無處非  
團卽無處非防擒匪雖眾總不及百姓之多處處與之爲敵賊何  
敢長驅直入較之勒民派勇以有定之防勇禦無定之賊蹤得失  
懸殊無難立辨臣見奉諭旨趕緊集團練勇以輔兵力自當欽遵  
趕辦無如勒派之勇不撤則民力已竭近日各處官紳皆以勢難  
兼辦稟請畫一章程勢處萬難十分掣肘臣亦知撫臣總管軍務  
地方呼應較靈非與和衷共濟必無實效乃細察撫臣之意總以  
改其見辦章程爲憾兼以調派民勇曾經奏明辦有成效心存回  
護不肯變通臣奉命辦團爲大吏牽制諸事無可下手不得不據  
實憑陳伏候 乾斷見在擒匪竄至西華商水等處歸德境內安

謚無事開封許州各屬十分喫緊撫臣及關保安坐歸德鹿邑兩城不肯督兵追剿臣擬卽親至開許等處就近激勵民團防賊北竄上諭軍機大臣等昨據慶廉奏抽調歸陳練丁請暫緩裁撤並稱已與毛昶熙商酌是以朕准其所請今據該大臣所奏此項民勇旣不得力自應全行裁撤改歸民團慶廉身任封疆全在與紳士和衷商辦始能聯絡一氣若偏執己見心存回護齟齬不合於事豈能有濟仍著與毛昶熙會同商辦一切不得各存意見致誤事機見在西竄賊匪尙未回巢開許一帶喫緊著與關保督兵進剿若統兵大員安坐不出將士豈能用命其傅壽彤冒銷勇糧之處卽著查明嚴參將此由六百里各諭令知之○予江蘇被戕參將張朝綱祭葬世職○丁丑上至熱河詣綏成殿行禮○諭內閣朕見在駐蹕避暑山莊天氣漸寒所有隨扈侍衛官員章

京等每員著賞給銀五兩兵丁每名著賞給銀三兩以示體恤至  
每日應給口分若干著總理行營王大臣妥速具奏○袁甲三奏  
據李世忠稟稱叛逆薛城良自高寶泗水潛逃行至來安經該鎮  
設法誘赴滁州陽示羈縻藉觀向背詎該逆狼子野心毫無悔懼  
膽敢遣其胞弟薛之和私赴定遠與張翼二逆暗中勾結斷難姑  
容當派參將李顯發等將薛城良及其弟薛之和其子薛玉堂薛  
玉根一併正法並將薛城良首級解送前來臣親驗無異卽派委  
員弁解赴滋事地方懸桿示眾查該逆薛城良前次陷身不義事  
急投誠仰蒙 皇上天恩宥其已往優予官職並經和春等按月  
給餉派防九洲洲宜如何感激圖報乃因江南軍情失利遽將全  
軍撤退竟置九洲洲要隘於不顧旋卽藉餉滋鬧糾眾數千人沿  
途焚掠江北人心大爲震動雖經水師兜擊將其全股撲滅而首

逆竄逃希圖再逞幸經李世忠設法誘擒將該逆父子兄弟同時  
正法不留餘孽實於軍務所關非細謹將尤爲出力人員開列籲  
懇恩施 上諭漏網首逆薛城良遣其胞弟薛之和私赴定遠與  
張龔二逆暗中勾結意圖再逞李世忠密派參將李顯發等將薛  
城良及其弟薛之和其子薛玉堂薛玉根一併正法洵足彰國法  
而快人心李世忠公而忘私殊堪嘉尙著卽補授江南提督以昭  
優獎○恭親王奕訢等奏洋人有在通州議和之語已給與照會  
諭嘉其措詞得體卽命相機辦理○戊寅諭內閣江南提督張國  
樑由廣西自率所部隨同向榮轉戰數省所向無敵朕見其謀勇  
兼優功勳卓著由偏裨擢至提鎮大員並令幫辦江南軍務殊恩  
異寵屢次褒嘉復因其克復城池賞給世職該提督感激圖報誓  
志滅賊數載以來東南半壁倚爲長城詎意本年夏間金陵大營

潰敗和春退守丹陽張國樑自鎮江往援出城擊賊身受重傷策騎渡河人馬俱沒於水先後據薛煥等奏報朕猶以爲傳聞之譌未卽開缺諭令詳細確查並命其弟尋覓骸骨尙冀該提督不死出爲國家宣勞乃距今數月終無確耗其爲業經捐軀已無疑義若使張國樑尙在蘇常一帶何至糜爛若此追念盡臣益深愴惻張國樑著追贈太子太保銜照提督陣亡例從優賜卹所有任內一切處分悉予開復入祀昭忠祠並著於死事地方及該提督原籍建立專祠以慰忠魂該提督子孫幾人著廣東督撫查明俟服闋後送部引見候朕施恩用示朕眷念勤勞優加褒卹之至意尋予祭葬世職諡忠武○諭軍機大臣等據王有齡奏蘇常各屬團練望兵甚殷請飭統兵大臣兩面會剿並嘉興軍營失利各摺片蘇常失陷以來不見官兵已逾三月吳縣各鎮舉辦民團均尙安

靜其無錫金匱武進陽湖江陰各縣亦行團練殺賊甚多惟日久支持筋疲力盡若大兵遲到恐難久存曾國藩本有八月進兵之議見在左宗棠張運蘭李元度等當已趕到著卽派令該員等督率兵勇或從太湖進攻蘇州無錫或從廣德進攻溧陽宜興以分賊勢而慰民心其嘉興一軍營盤如何失守著瑞昌王有齡等查明首先潰退之員嚴參懲辦一面飭令張玉良等奮勉圖功整軍前進一面布置城守事宜嚴密防堵毋令該逆擾近省城是爲至要將此由六百里加緊各諭令知之○己卯曾國藩奏接准王有齡兩次咨函張玉良嘉興大營於七月二十三日後路爲賊所包遂致全軍潰退張玉良受傷退至石門賊復攻陷石門距省甚近杭城危急請分隊救援臣奉旨接辦皖南軍務甯郡被圍兩月周天受困守孤城屢次求援臣見派鮑超張運蘭由涇旌兩路赴援

甫經拔隊成行斷不能失信於甯國而改援浙江目今浙省賊勢浩大亦非三五千人所能救全臣處別無大隊可撥必須左宗棠新軍抵徽配足萬人乃可赴杭援剿特駱秉章奉督辦四川軍務之命奏明抽調湖南防兵又奏請左宗棠入蜀湖南官紳因吳蜀兩處徵調本境空虛人心驚恐是以左宗棠遲遲未能成行臣聞逆賊石達開尙在廣西四川縱或危亂尙在半年以後浙江之阨危則在一月以內卽皖南江西之安危亦在兩三月之內緩急迴殊仰懇 天恩飭令駱秉章暫緩入蜀湖南防兵暫不抽動俾左宗棠星馳兼程來皖合兩湖江西官紳之全力共救浙而攻蘇或有補於萬一瑞昌王有齡奏據張玉良咨稱七月二十三日賊眾傾巢出撲大營我軍連戰五晝夜疲乏已極力不能支全行潰退將士傷亡甚多張玉良身受重傷退紮石門軍器俱已遺失等語



臣等卽飭吳再升一軍扼守石門會同張玉良收集潰散兵勇實力堵剿一面飭令彭斯舉等防堵海甯惟查嘉興大營潰退後四通八達處處可以內犯防不勝防且蘇常逆匪大股來援賊勢甚重杭防所存兵勇雖有一萬數千名係收集潰散之眾且杭州城大地曠守禦甚難屢請曾國藩來浙會商共持大局至今尙駐祁門應請旨飭下曾國藩迅卽督兵來援以顧危局儻以兵未調齊不能赴浙卽由曾國藩就近兼顧徽防令張芾統帶所部星馳援剿或仍由曾國藩多撥勁旅飛速救援庶幾浙省不至糜爛大局尙可挽回 上諭軍機大臣等日昨因王有齡奏蘇常團練望兵甚殷諭令曾國藩卽派帶兵各員分路進攻以分賊勢而慰人心本日復據瑞昌等馳奏嘉興大營全行潰退張玉良身受重傷退紮石門杭州情形危急請飭曾國藩督兵來援如不能赴浙卽令

張芾星馳援剿並據曾國藩奏接王有齡函稱石門已陷賊匪距省甚近請分隊救援見派鮑超張運蘭赴援甯國不能改援浙江必須左宗棠新軍抵徽方可赴援等語見在浙江望援甚切若待左宗棠到後始行入浙誠恐緩不濟急徽防軍務已歸該大臣兼辦張芾如尙未交卸卽著該大臣知照張芾迅卽帶兵前往救援左宗棠前已有旨令其毋庸入川仍襄辦曾國藩軍務一俟該員到後或卽令赴杭或令進攻蘇常以牽賊勢由該大臣酌量辦理可也至該大臣請令駱秉章暫緩入蜀見在四川軍務緊急若曠日持久必致滋蔓難圖前據駱秉章奏抽調湖南防兵爲數亦不甚多不至有空虛之虞朕因翟誥尙稱知兵已賞給二品頂帶令其署理湖南巡撫以便駱秉章交卸啟程矣○前據駱秉章奏請令左宗棠帶勇入川隨同助剿當因蘇常一帶喫緊諭令左宗棠

仍赴曾國藩大營襄辦軍務本日據曾國藩奏嘉興軍營潰退浙  
江省城危急必須左宗棠新軍抵徽乃可赴杭援剿見在駱秉章  
督辦四川軍務抽調湖南防兵本省空虛左宗棠遲遲未能成行  
請飭駱秉章暫緩入蜀俾左宗棠兼程來皖等語四川賊勢鴟張  
若再曠日持久誠恐滋蔓難圖且蕭啟江所部楚勇甚爲得力惟  
王沐官職較卑未能駕馭亟須大員統帶著駱秉章仍遵前旨帶  
領得力員弁兵丁迅速赴川以期力保完善之區並著催令左宗  
棠趕赴曾國藩大營毋再稽延將此由六百里諭令知之○命官  
文等派兵赴京都興阿統帶馬隊入援○賞翟誥二品頂帶署湖  
南巡撫由按察使署○命綏遠城將軍成凱盛京將軍玉明陝甘總督  
樂斌山東巡撫文煜河南巡撫慶廉山西巡撫英桂統兵入援以  
庫倫辦事大臣德勒克多爾濟署綏遠城將軍盛京戶部侍郎倭

仁署盛京將軍甘肅布政使林揚祖署陝甘總督山東布政使清  
盛署山東巡撫河南布政使賈臻署河南巡撫山西布政使常續  
署山西巡撫○庚辰勝保奏力疾銷假得旨報國心殷實堪嘉尙  
○辛巳諭軍機大臣等前因恆福奏請赴熱河隨扈業經批示勿  
庸前來俟夷務定局回鑾時赴口接駕見在京北一帶地方緊要  
必須有大員坐鎮且沿路兵差絡繹文報紛繁所有各州縣應辦  
事務必須該督前來呼應較靈恆福著卽到古北口內駐紮以資  
督率其天津一帶夷務卽著賁成寬惠等會同焦祐瀛等辦理可  
也將此由六百里諭令知之○恭親王奕訢等奏撫不可恃請飭  
統兵大臣激勵兵心以維大局從之○壬午諭軍機大臣等本日  
據錫齡阿奏乍浦官兵會同援軍克復縣城一摺據稱七月二十  
一日克復平湖後卽於二十二日將嘉善縣城克復第滿洲官兵

駐守乍浦更兼四路土匪甚多實屬不敷遣調斷難兼顧兩縣請飭副將陳步高帶兵駐守平湖分紮嘉善等語浙江自嘉興大營潰退後省垣戒嚴見在未知情形如何實深廬念平湖嘉善甫經收復必須有重兵駐紮防其回竄陳步高一軍如尙未調赴他處卽著分紮該兩縣以資防剿儻兵力不敷或卽飭令協領多仁布等協同守禦著瑞昌王有齡斟酌辦理並著傳知錫齡阿浙省援兵昨已寄諭會國藩令其派兵分路進攻以分賊勢但恐緩不濟急張芾一軍未知曾否趕到該將軍等與其株守省城莫若飭張玉良等迎頭截擊使賊不能逼近城池方爲妥善將此由六百里諭令知之○廣東巡撫耆齡奏進攻樂昌仁化逆匪獲勝得旨收復城池暨打仗出力人員著擇尤酌保數人隨同收復之本地方官不准過爲開脫○癸未諭軍機大臣等據龐鍾璐奏常昭縣城

失守請飭都興阿駐紮江北相機規復一摺江南自蘇常失守徧地賊蹤常熟昭文官紳尙能激勵民團同心固守前以該匪大股猝至眾寡不敵縣城遂於八月初二日失陷都興阿見時未能卽抵江北鎮江官軍雖向奎所部經薛煥調往上海尙有李若珠派來援兵著巴棟阿酌量情形派兵迅圖克復並著於沿江各要隘嚴密防堵勿令該匪北竄是爲至要將此由六百里加緊諭令知之○予江蘇陣亡從九品龐祖安等祭葬世職○淀園火○甲申諭軍機大臣等本日據慶廉奏官軍追擊捻匪總兵承惠陣亡見乏督隊得力之員請派曾經出師打仗勇往之鎮將二員來營調遣等語河南軍務緊要督隊需員著袁甲三於軍營得力鎮將中挑選兩員卽行派往交慶廉差遣如鎮將無人可派亦可於參遊內擇其能得兵心打仗奮勇者派往前調總兵滕家勝帶勇前來

諒已接奉諭旨著卽飭令星夜遄行毋得遲誤將此由六百里諭令知之○諭前因夷氛直犯京師諭令慶廉迅卽統帶精兵星夜前來將河南剿匪事宜交毛昶熙會辦該撫諒已接奉此旨本日據慶廉奏官軍眾寡不敵鎮將被戕是河南捻匪情形正當喫緊之際設或該撫帶兵北來逆捻一聞此信乘機北竄尤爲可慮毛昶熙未諳軍務亦恐呼應不靈著慶廉體察情形如不能動身前來卽著前調之副將黃得魁遊擊趙喜義等管帶新募彝勇及得力楚勇共數千名兼程前進剋日到京以資調遣該撫請派曾經出師打仗之鎮將二員已諭知袁甲三由該大臣軍營揀派矣將此由六百里諭令知之○工部尙書兼管順天府府尹事張祥河等奏車輛雇覓維艱得旨所奏自係實在情形務期無誤要需斷難拘於例價著實用實銷勿得稍涉虛冒又奏請修墊橋道批撫

局已成朕卽回鑾惟此時尙不必豫爲降旨況回鑾橋道不過略加修葺耳無虞趕辦不及○予河南陣亡總兵官承惠等祭葬世職○乙酉督辦貴州軍務署貴州提督田興恕奏由湄潭甕安赴省得旨赴省應援無後顧之憂方爲妥善○左副都御史張芾以補行守制請開缺回籍從之○丁亥諭內閣邵燦等奏請飭地方官會辦團練等語團練一事雖屬紳民義舉非地方官會辦亦恐呼應不靈所有浙江團練事宜著責成邵燦王履謙會同該省地方官認真辦理如有地方官及紳士人等從中阻撓或藉詞推諉卽著邵燦會同王有齡據實奏參至團防經費畝捐尙未辦齊准其於紹興府捐輸項下酌量提用○諭軍機大臣等前據寶山奏吉林頭起官兵業已抵關日內想已陸續到齊著卽嚴密布置以資守衛前調黑龍江兵二千名計期亦應進關見在夷氛緊急著



卽飛催帶兵官迅速前赴熱河毋稍遲滯如尙未到關並著趕緊迎提是爲至要○諭前有旨令恆福迅赴古北口內駐紮督率地方官辦理一切本日據恭親王等奏正議撫局該夷酋於二十二日直犯圓明園焚燒街市恆福已到蘆溝橋道阻未能前往請令吳廷棟赴口等語著慶昫傳知吳廷棟卽令該臬司由張家口趕緊赴古北口駐紮督辦往來兵差文報各事宜毋稍延緩將此由六百里加緊諭令知之○劉長佑奏石逆餘黨數萬自東泉瓦窯敗衄後志在奪路竄越湖南迨至板攬斗江楚軍旣阻之於前粵兵復乘之於後沿途團練又節節邀截乃改計分道並出牽綴兵勇冀得乘虛以窺省垣其由板攬回竄永甯一股係石逆後隊約七八千人經團紳姚宏緒等督團截剿敗之於三隍又敗之於喇塔七月十七十八等日圍撲雒容縣屬之中渡該處團總黃趾麟

督練守禦斃賊頗多候補總兵李明惠復撥營勇前往援剿大獲  
勝仗賊走黃冕查黃冕爲柳州入省大路該匪悉眾竄踞勢將斷  
我聲援李明惠恐追之太急賊必竄偏省垣又恐太平股匪伺隙  
出擾勢難兼顧一面將勇調回東泉一面飛函商請進止臣已由  
柳州洛垢酌撥數營馳赴黃冕相機進剿復函去後探報畹田股  
匪半由中營圩橫竄靈川七都查係石逆左旗其頭隊已至潭下  
圩距省止五十里臣與在城文武日夜巡防並調回防勇環紮城  
外藩司張凱嵩又調練勇千餘人陸續入城人心益固先是疊訊  
賊供知此股匪黨因背石逆欲回金陵臣會徧發告示准其投誠  
二十四五等日長髮賊目衛輝應等率眾乞降臣宣布德意許以  
立功自贖仍一面督飭兵練照常守禦一面委員候補府鳳貴等  
前赴廟塘圩逐加點驗共收投誠壯丁七千餘人疲弱者三千餘

人二十九日臣令參將陳周典等率勇數千馳往靈川興安追左

旗股匪出隊後接到李明惠函報後旗賊匪尙踞黃冕分擾理定舊街一帶當派各營出隊親督追剿二十五日追至理定該匪望旗潰奔都司陳本熾李正植等奮力追剿殲賊三四百名其自相踐踏落水者無數是夜該匪竄至永福城外之五里橋築卡抵禦李正植率軍功楊子吉等用劈山礮連環轟擊賊始棄卡狂奔我軍追至五里橋地方圍練亦四出截擊殺死溺死賊匪千餘人李明惠見賊勢已蹙派勇悉力跟追自率三營仍由永福撤回柳州同日又據李正植稟報追剿賊匪已至兩江圩沿路擒斬甚眾餘匪悉竄義甯縣境查此股賊匪疊經挫敗自應乘勢殲除已飭副將鄔世望等督勇前往與柳州各營合力窮追並知會湖南防兵夾擊不使餘孽蔓延至投誠部眾人數逾萬其畱營隨剿者固宜

籌發資糧卽遣散回籍者亦應酌給路費無如軍餉萬分支絀每慮力不從心又查投誠人民多隸江西安徽湖北湖南各省茲既自拔來歸未便令其失所應請旨通飭各省督撫轉飭各屬州縣遇有投誠人民回籍悉令安居復業勿復追究從前並懇飭下沿途經過省分發給口糧酌撥兵役護送出境得旨勦撫兼施實中款要至遣散回籍各投誠義勇止可酌發口糧執照礙難多撥兵役護送著卽將所奉硃批飭行各省未便又降諭旨○劉長佑奏探報石逆及賊目賴贛新尙盤踞武緣城外遣眾往攻南甯府城疊經官兵擊敗仍復死拒未退該府城郭堅固畱署左江道吳德徵在任年久曉暢軍務深得民心應可力圖戰守臣已飛咨督臣飭令廉州等府就近會合援應兼扼入東之路報聞○己丑諭軍機大臣等本日據僧格林沁等奏夷人退出圍庭一摺僧格林沁

瑞麟統帶重兵節節退紮已屬畏葸無能此次夷人直犯圓明園肆行橫搶又不能馳往救護實屬咎無可辭僧格林沁著革去爵職仍畱欽差大臣瑞麟著卽革職均仍畱軍營帶兵堵剿保護京城力贖前愆○庚寅諭內閣薛煥奏參總兵屯兵不進以致縣城潰陷請革職戴罪圖功等語據稱金壇縣被圍日久該縣文武嬰城固守稟請總兵馮子材撥兵救援該總兵大書斷難往援等語露封送往兵民共見遂致人心渙散迨經巴棟阿派令援剿兵已逾萬不難間道馳往內外夾擊力解城圍仍復駐紮鄰境遷延觀望一聞城陷隨卽撤兵而回似此種種乖謬畏縮不前僅予革職尙不足以蔽辜馮子材著先行革職暫畱軍營仍著巴棟阿確切查明如實係有心規避卽行嚴參懲辦○諭軍機大臣等據瑞昌奏大兵進剿統領乏員請飭張芾赴浙督剿一摺據稱張玉良自

嘉興潰退以後威望頓挫不足以資統馭張芾御兵嚴整甚得兵  
心懇請飭令來浙幫辦軍務督軍進剿嘉興等語昨因張芾奏請  
回籍補行守制業經降旨允准如張芾尙未離徽卽著曾國藩飭  
令赴浙幫辦軍務本日又據薛煥奏蘇省常昭已陷上海岌岌援  
兵不至亦恐難支著曾國藩酌量情形速籌援救是爲至要將此  
由六百里諭令知之○克勤郡王慶惠等奏城守事宜未可深恃  
公同將巴夏禮等交恆祺送往該營以示寬大因恭親王業經移  
寓未能函商從權辦理奏入諭守城各王大臣等悉力守禦一切  
換約事宜聽候恭親王等擇地辦理○慶惠奏請飭恭親王入城  
辦撫得旨已諭恭親王擇地就近駐紮斷難在城內辦撫又奏連  
日多有潰兵進城批進城潰兵應嚴密訪查不可置之不問○勝  
保奏見在布置情形得旨摺中並未敘及傷愈情形殊深廕念見

能騎步如常抑尙需人扶掖又奏暫駐天甯寺以待新兵必須痛  
勦再行議撫得旨所奏不爲無見○署四川總督崇實奏巴布夷  
人就撫得旨該夷旣係野夷就撫回巢實爲正辦况該土司出具  
切結更不值重煩兵力○杭州將軍瑞昌等奏省城官軍潰退得  
旨張玉良著革去幫辦並提督銜仍責令督兵進勦瑞昌所請嚴  
議之處著寬免又奏請派張芾赴浙已諭曾國藩矣○袁甲三奏官軍  
進勦定遠偏城爲壘無戰不捷該逆被勦情急屢圖出竄均經截  
回外援亦均擊退前據獲賊供稱粵逆大股卽日來援臣一面於  
奏報摺內聲明一面會商臣穆騰阿督飭各軍上緊圍攻據練總  
稽開泰等稟稱僞西平主將吳如哮由廬州帶隊來援當派西北  
兩路兵勇會同副將徐立壯合力兜勦交仗六次營總常喜受傷

三處猶復裹創力戰統計斃賊二百餘人南路賊鋒稍挫旋據東  
路探報僞英王四眼狗糾合大股粵逆由石埠橋過江至浦六交  
界之葛塘集號稱十萬聲言赴援定遠由天長竹鎮石梁一帶晝  
夜疾趨臣得信後趕飭副將格洪額參將許保清都司蔡福同沿  
途鈔擊羈斃頗多該逆避兵而走飄忽異常已由三界石壩向池  
河一路南竄八月十二日由池河分竄定遠南路繞截徐立壯糧  
道徐立壯出隊衝擊互有殺傷該逆愈聚愈眾城內之賊亦乘勢  
出撲徐立壯前營九座均被圍困臣與穆騰阿飛飭副都統烏勒  
興額等管帶全起馬隊並挑選步隊六千人會合西路總兵尹善  
廷等馬步兵勇於十三日冒雨馳赴嚴澗橋援剿並派知府張汝  
梅等分列隊伍於東西岡以牽賊勢十四日該逆見我援軍驟至  
分股迎撲我軍以步隊夾馬隊奮勇衝擊賊眾三千餘人立被壓



下我軍偏過溝南槍斃執旗黃衣賊目一名徐練各營隨即解圍詎該逆此竄彼來倚恃人眾更番迎拒我軍展轉對敵勇氣倍加斃賊甚多而賊聚愈眾隔溝相持一夜未經收隊十五日正鏖戰間東南又來另股直撲徐立壯後營張得勝等軍奮力轟擊徐立壯帶隊衝出營內火起練眾往西撤退我軍轉戰兩日兵已飢疲該逆由東南兩路包鈔層層圍裹我軍分投截擊眾寡懸殊頗有傷亡幸張汝梅等帶隊接應始各撤回臣查我軍進攻定遠長圍偏困本屬呼吸相通徐立壯管帶練勇獨當南路一面平日打仗甚屬奮勇茲以粵逆驟至糧道被阻營盤被圍雖前營業經衝出而後營尙不知退紮何處東南偏地賊營徐練既撤竄路已通西北兩軍勢成孤注况逆眾十倍於我設該逆由後路鈔襲斷我糧路必致全軍坐困終成潰裂臣與穆騰阿熟商惟有飛飭西北各

軍暫行撤退分願後路扼守長淮以全銳氣見幸將士並無損傷  
軍械並無遺失一俟布置稍定再圖進取藉固北路藩籬報聞○  
予江南陣亡總兵官魯占鼇浙江陣亡知縣李宗謨等祭葬世職  
九月壬辰諭軍機大臣等本日據勝保奏齊集援兵靜以觀變一  
摺足徵該大臣忠勇性成赤心報國著卽授爲欽差大臣並開缺  
以侍郎候補總統各省援兵相機剿辦卽由勝保知照禮部頒給  
關防○諭本日據王夢齡奏清淮餉源告竭請迅賜飭催等語據  
稱疊據徐州探報捻匪藍黑白三股繞出宿營後路沿途焚掠竄  
至徐城迤西之雙溝愈趨愈東邳睢境內均有大股滋蔓欲由窯  
灣等處搶渡滋擾並有分竄清淮之意前因王夢齡奏請借撥兵  
餉當卽諭令山東山西河南各省借撥銀四五萬兩迄今幾及三  
月何以尙無絲毫解到著文煜常績慶廉仍遵前旨迅速各籌銀

三四萬兩委員星夜解赴清淮如一時尚不能齊亦須先解二三萬兩毋誤要需將此由六百里各諭令知之○諭本日據英桂奏酌調各路官兵親帶赴京並請飭山東河南得力將領帶兵前來等語據稱見於省標挑選官兵一千名大同鎮兵二千名分撥馬匹咨調將領一俟到齊星夜親帶赴京並咨大同鎮總兵慶德先帶本標官兵前來見已派勝保爲欽差大臣到京時著卽隨同勦辦河南練勇素稱強壯前已有旨諭令慶廉挑選精健數千名令副將黃德魁遊擊趙喜義管帶前來助剿見在山東防堵正在喫緊德楞額前請帶兵親來已有旨令其暫緩來京矣將此由六百里諭令知之○諭昨接二十六日奏報知恭親王等尙在長新店居住聽候恆祺之信連日如何情形務卽迅速具奏見在夷人退至黑寺自圓明園一帶至黑龍潭太子府沙河清河等處地方土

匪肆擾以致文報阻隔行旅不通若不早行懲辦誠恐聚集日多釀成大患綿勦派撥之兵二千名未知會否到園亦須有大員統帶方能得力本日已改派文祥署理圓明園八旗包衣三旗印鑰其綿勦派撥之兵一併歸文祥調遣著卽調集各旗及巡捕營官兵飭令將各處土匪嚴行捕拏立卽正法以靖地方而通道路長新店距城較遠文祥若仍在該處亦覺鞭長莫及著恭親王等在京城西北附近地方擇地駐紮文祥便可兼顧園庭仍隨恭親王辦理一切正在寄諭間接據勝保奏因和礙戰見處情形一摺據稱各起官兵二三日內皆可到齊惟道遠赴援不無疲憊自應量予休息始可卽戎無如守城諸臣汲汲議撫方且訂期開城爲休兵息民之策再四思維惟有齊集援兵靜以觀變如謹守條約相安無擾亦不敢自生外釁如竟顯然反覆或屯兵不撤自當相機

而勳等語該夷於城北一帶修築礮臺並至城根測量遠近已諭令慶惠等激勵眾心堅守以待並將候補侍郎勝保投爲欽差大臣總統各省赴援諸兵整軍備勦著恭親王等迅卽給予照會責其修築礮臺之非如仍遵前約並不另生枝節卽可畫押換約以敦和好由恭親王等斟酌辦理可也○戶部左侍郎左翼總兵文祥奏夷人竄擾園庭請分別治罪得旨陳良才等四員均著革職畱任並摘去頂帶飭令嚴拏土匪如再不知愧奮卽行嚴參文祥著革職畱任麟魁慶英均著降四級畱任○癸巳內閣欽奉 硃諭軍機大臣自隨扈以來諸務繁多舉凡承旨書諭並札咨事件倍於平時尙能鉅細無遺昕夕在公穆蔭著加恩賞賚黃馬褂匡源杜翰均著加恩賞戴花翎以示優眷○予河南陣亡知府王榮烈等祭葬世職○甲午豫親王義道等奏臣等爲保護城池起見

不及候恭親王等函商暫開一門許洋人入城見尙安靜專待辦

撫王大臣親來換約命恭親王等入城將本年所議續約畫押蓋

印八年天津和約互換令洋人退出京城再商定駐京章程○義

道等奏俄羅斯使懇請來京命文祥由軍機處給予照會令其進

京○諭僧格林沁等派員查拏土匪疏通道路○大學士彭蘊章

以病乞休允之○許乃普以病免調陳孚恩爲吏部尙書以沈兆

霖爲兵部尙書萬青藜爲左都御史黃宗漢爲吏部右侍郎候補侍郎

○予湖南陣亡主簿楊雋等祭葬世職○駱秉章奏查粵東賊目

周春粵西賊目曹偉人等均係石逆夥黨兼聞逆目賴積新亦與

曹偉人會合蹤迹詭幻出沒無常屢據獲賊供詞或稱圖竄湖南

或稱欲由湖南竄江西因湖南各路防堵嚴密該逆但思取道邊

界以爲竄江之謀若備禦稍疏卽難保不伺間以逞使湖南有事

則從征兵勇室家在念無以安各省楚軍之心儻江西被擾則皖  
浙皆警亦恐掣東征大局之肘臣前因張運蘭一軍調赴皖南卽  
飭同知楊安臣副將朱升開等添募勇丁分赴桂陽宜章扼要設  
守據探東昌仁化兩城俱爲賊踞東昌一股有併趨仁化之說復  
飭同知魏喻義自臨武移紮宜桂交界地方聯絡布置七月十九  
至二十三等日粵東逆賊連次犯界均經我師截擊未令竄越惟  
仁化壤接江楚賊蹤相距非遠邊防仍不可稍鬆而粵西石逆分  
股之竄擾融縣懷遠者始於斗江搭造浮橋圖窺通道經參將江  
忠朝擊卻復擾義甯永甯靈川興安灌陽等處沿途裹脅勢甚猖  
獗臣從前奏明令黃淳熙防堵城步令劉嶽昭由東安赴新甯原  
期厚集兵力迅將此股掃蕩庶楚邊撤防得力兵勇可以抽調遠  
征今賊勢漸東已於八月初七日闖入永明縣境雖經周達武王

永章合力擊退然賊鋒尙未大挫若令越過永明卽慮蔓延爲害  
臣已飭劉嶽昭折回永州暫統南路諸軍通籌防剿並飭黃淳熙  
移紮東安江忠朝回駐新甯如機有可乘卽便分道齊出併力剿  
辦臣欽奉諭旨飭令催齊兵勇迅速入川查湖南邊防喫重永道  
各州縣人心惶惑未便遽將重兵調開前所調劉長槐于高勝朱  
品文三營又以皖北軍務正當緊要僅准將朱品文一營派遣回  
南尙未據報行抵何處節經飛催劉嶽昭黃淳熙安速布置但使  
兩軍中有一軍可以勉強抽調臣卽督帶入蜀冀紓聖主西顧  
之憂報聞○乙未己革大學士瑞麟奏擬於田卹擇地諏吉恭奉  
孝德皇后梓宮 雲嬪 璿常在 珣常在 鑫常在采棺暫  
安得旨所辦甚好○丙申總管內務府大臣寶璽奏禁園被搶印  
信遺失得旨文明革職畱任寶璽撤去巡防一切差使降爲五品



頂帶暫停開缺以觀後效○丁酉諭軍機大臣等前因田興恕奏請仍由湄潭寶安赴省當經諭知赴省應援無後顧之憂方爲妥善本日據劉源灝奏獨山定番兩州均被粵逆攻陷距省甚近人心震恐城中僅有飢疲之兵數百名萬不足恃請飭田興恕迅速赴援等語粵逆糾眾數十萬逼近省城情形岌岌可危自應先其所急以固根本著田興恕統帶得勝之軍徑由婺川遵義赴省救援此路並無賊阻迅速可到其湄潭寶安兩縣賊匪可派兵分剿以顧後路俟省垣附近一帶賊勢稍鬆再出省以次剿辦該撫請飭催四川各省餉銀已諭令崇實等籌撥矣將此由六百里各諭令知之○豫親王義道奏僧格林沁屢著戰功仰懇恩施得旨朕視滿蒙臣僕原無二致何必妄自分別況此次失礮臺者僧格林沁非瑞麟也又非終身廢棄更何必代爲乞恩此摺若係汝一人

之見不過識見未充情尚可恕若係與畱京守城諸人商酌具奏乞他人之恩掩己畏蒞之罪更屬非是○命署四川總督崇實迅籌銀二十萬兩解赴貴州軍營充餉○予河南陣亡知縣田玉梅等祭葬世職貴州殉難知州侯雲沂祭葬世職建祠○己亥署山海關副都統寶山奏報吉林官兵業經調齊得旨各項兵團統歸汝調遣○命山東山西各巡撫親帶兵勇駐紮直隸境內備調○辛丑曾國藩奏張運蘭一軍於八月初八日帶隊行抵旌德探聞涇縣之賊竄踞東岸長興建平之賊竄襲廣德州逆酋四眼狗竄踞甯國縣該道防賊鈔後暫紮旌德與宋國永一軍東西援應宋國永於八月初六日行抵長園探聞石埭大股賊匪竄入鐵家嶺三叉嶺所有徽軍原防太平甘棠之副將余永椿參將袁國祥等營盤被陷宋國永派營分紮山口烏泥關以當前敵初七日賊眾

繞撲我營當卽派隊擊退初八九等日宋國永追賊至太平三口一帶旋即進紮甘棠分布各嶺查僞輔王楊七麻子攻圍甯郡已久十六日接周天受密書知城外各營全陷城內糧藥俱盡勢將不支正在飛催馳援十七日據探甯國郡城已於十三日戌刻失守並據副將熊廷芳自甯郡潰圍退至旌德稟稱十二日大雨如注火藥不然賊乘勢撲入各營同時潰散賊分踞我營拋擲火器入城周天受令百姓上城守禦各隊兵勇開南門衝出千餘人城池遂陷周天受及道府各官不知下落等語查甯防兵勇近七千人堅守七十餘日屢經擊退賊匪乃賊黨四面圍至糧盡援絕一朝失陷實堪痛惜張運蘭馳抵旌德甯邑陳逆伺其右涇縣賴逆阻其前兵力過單勢難獨進宋國永馳抵太平因徽軍有余永椿之敗西路未清該二員尙非赴援不力應免置議李元度於八月

十六日帶勇抵徽已在甯郡失事之後暫令接辦徽防事務鮑超  
於春間請假三月乃六月間由蜀起行逾期已久八月二十日始  
到祁門遷延貽誤咎實難辭應請旨將綏靖鎮總兵鮑超革去勇  
號以示薄懲仍責令督軍進勦力圖克復至浙江候補道廖士彥  
經周天受飭令赴浙催餉業已撥給餉銀該員沿途逗畱聞警折  
回致甯軍因飢敗潰尤屬畏葸無能應請旨將廖士彥卽行革職  
臣甫經奉命接辦皖南軍務兵將未齊派援未至甯郡卽已失守  
亦有應得之咎並請旨將臣交部議處皖南鎮總兵陳大富駐紮  
南陵堅守半年今甯國旣失南陵孤懸賊中萬難獨守臣已屬其  
自拔出城潛至江邊由水師接送上游以圖再振甯郡旣已失守  
嶺外各股悍賊乘勝內撲徽績祁黟處處交警臣仍駐紮祁門飭  
李元度防守徽州添派禮字及河溪等四營馳往績溪協防張運

蘭仍紮旌德鮑超一軍仍駐太平堅守靜鎮以伺逆賊之隙飛催左宗棠新軍倍道來援共圖克復甯廣以期進規蘇常 上諭內閣前因甯國被圍屢經降旨令曾國藩分軍往援當據奏報已令張運蘭宋國永馳抵旌德太平等處卽遇悍賊窺伺兵力過單未能前進尙非救援不力均著免其置議鮑超請假逾期至八月二十日始到祁門遷延貽誤咎實難辭姑念其驍勇素著革去巴圖魯勇號以示薄懲仍責令督兵進剿力圖克復至浙江記名道廖士彥經周天受飭令赴浙催餉業已撥給餉銀並由張芾派委營員協同護送該道沿途逗畱聞警折回以致甯軍因飢敗潰尤屬畏葸無能廖士彥著卽革職以示懲儆曾國藩甫經接辦皖南軍務雖因兵勇未至究屬失於防範著交部議處周天受嬰城固守數月之久力竭被陷殊堪憫惜著查明該提督及闔城文武下

藩迅速具奏○諭軍機大臣等據僧格林沁奏派員防守古北口情形一摺據稱和議漸有就緒有無變更尙難豫定古北口雖有馬隊尙形單薄見飭成保帶領提標官兵會同烏蘭都布置防守並令密雲協領恩成帶兵五百名前往駐紮統歸成保管帶等語俱著照所議辦理本日復諭杜剏等將曹勇三千酌量改歸南路助剿以杜捻匪北竄該大臣無庸行文阻止附京一帶土匪肆搶前經該大臣等奏稱已派西凌阿帶兵在清河紮營朕聞該處並無官兵駐紮該都統係在何處避匿著僧格林沁等查明參奏將此由六百里諭令知之○諭據傅振邦奏苗練未能遠調先撥兵勇赴京並自請北上助剿一摺苗沛霖所部練勇自滄南一挫尙須再加整頓自屬實在情形且見在粵捻勾結南北交乘未便調令遠出著卽無庸飭令前來傅振邦抽撥之馬步官兵一千五百

餘名仍著協領恆齡參將玉祥等管帶星夜赴京歸勝保調遣該提督自請北上之處前經批示汝欲赴京自效奮勇可嘉惟捻氛逼近東境能截賊回巢勿使北竄直東卽爲汝功著仍遵奉此諭毋庸前來將此由六百里諭令知之○諭據英桂奏派兵分起前進等語據稱先派參將珠爾杭阿管帶省標官兵前進並咨總兵慶德由宣化府一帶至近京聚齊復添調太原鎮標官兵五百名派城守尉慶瑞統帶作爲後路除珠爾杭阿等所帶官兵應隨英桂駐紮直境外其慶德所帶一軍如由宣化而來亦可畱於京城西北一帶拏辦土匪著勝保斟酌辦理本日據袁甲三奏已派張得勝帶得力勇丁一千二百起身並穆騰阿自請帶馬隊一百名前來都興阿尙無啟程之信如穆騰阿先到卽著該都統幫辦勝保軍務其苗練一軍據傅振邦奏苗沛霖稟稱自澮南一挫尙

須再加整頓未能遠出該提督已派協領恆齡等帶兵勇一千五百餘名赴京著歸勝保調遣至山東曹勇三千名據杜翻奏稱趙康侯等統帶已於九月初一日啟程見因捻匪意圖北竄山東南境空虛已諭令杜翻文煜酌量令此項團勇折回隨德楞額助剿如日內業已到京卽著勝保察看斟酌去畱並籌給糧餉毋令缺乏將此由六百里諭令知之○諭據杜翻奏檄調民團赴北援剿一摺據稱飛札調取鄆城民勇三千名派趙康侯季錫魯帶領北上已於本月初一日啟程並由藩庫借撥銀四萬兩以作餉需等語本日據德楞額奏捻匪北竄見雖極力扼截情形甚爲喫重文煜業經帶兵北來南路空虛無人策應見在山陝直隸各省兵勇到京者已不爲少著杜翻文煜酌量情形將此項勇丁飭令折回赴嶧縣一帶隨同德楞額剿辦捻匪或酌畱一半歸文煜統帶儻



接到諭旨時趙康侯等業已到京仍著歸勝保調遣將此由六百里諭令知之○諭曾國藩奏請飭江陝兩省協濟皖餉等語據稱皖南徽防之餉歷奉諭旨江西每月協解八萬近來僅解三萬少或二萬安慶一軍亦向該大臣索餉本省無可籌撥軍務實難支持自係實在情形著毓科每月將漕折銀協解五萬兩內以三萬兩撥濟徽防以二萬兩撥濟甯防並著譚廷襄每月協濟銀二萬兩解至湖北交官文等專發安慶一軍解三箇月卽行截止該撫等務卽飭令該藩司迅速撥解毋誤要需將此由六百里諭令知之○諭袁甲三奏派委張得勝帶勇助剿並請畱鄭魁士幫辦軍務各摺片據稱接奉諭旨密飭張得勝挑選得力勇丁一千二百名星速北上見在令勝保嚴兵以待此項勇丁著卽兼程前來歸勝保調遣穆騰阿前請回京辦理軍務因定遠正在喫緊業已

諭令該都統毋庸赴京鄒魁士並准其畱皖助剿該大臣等尙未  
接奉諭旨此次穆騰阿旣已管帶馬隊起身卽著前來幫辦勝保  
軍務穆騰阿離營後著鄒魁士幫辦袁甲三軍務該大臣自請來  
京之處見在鳳陽賊氛正熾業已批示毋庸前來矣將此由六百  
里諭令知之○曾國藩奏臣前奏通籌大局不撤安慶之圍以取  
上游之勢調募兵勇原期七月取齊八月進剿冀從廣德一路疾  
趨蘇境不料廣德再失而甯國又陷八月將盡兵將尙未畢集不  
特不能救浙圖蘇並皖南亦岌岌可慮寸心愧憤無地自容然細  
察地勢舍此別無下手之方但使陳楊諸悍賊盡來皖南分救安  
慶則於臣處雖日形竭蹶於下游或少得蘇息總之臣身在皖南  
心懸江浙財賦菁華之地蹂躪日甚一日卽餉源日絀一日生靈  
困苦所不待言 聖主軫念東南臣何敢不以 聖主之心爲心

蘇人痛深水火臣何忍不以蘇人之患爲患俟皖南立腳稍穩卽

當分派一路先趨蘇境以慰宸廑而符原議報聞○予江蘇陣

亡總兵官葉萬青等祭葬世職○壬寅諭內閣穆蔭見丁父憂軍

機處見在事務較繁著賞假十四日經理喪事假滿卽行當差俟

回京後再補行寫孝○以李菡爲工部左侍郎候補侍郎○癸卯諭軍

機大臣等黑龍江官兵陸續由熱河赴口不日卽可到齊見在兵

數既多必須大員統轄以一事權所有西安馬隊一千五百名黑

龍江馬隊二千名密雲步隊五百名均著歸恆福調遣此項官兵

素稱勁旅著督飭各帶兵官勤加操練不可令其日久生疲至密

雲縣暫存僧格林沁糧臺銀十八萬九千兩見在曾否全數提到

各項官兵口分卽由此款動用仍照戶部議定防兵口分按數支

發當此軍需浩繁經費支絀之時務當嚴飭辦理糧臺各員撙節

出入覈實支銷毋稍虛糜將此由五百里諭令知之○諭本日據巴棟阿奏蘇常大股逆匪攻撲鎮江請飭曾國藩迅速統師來南會合進攻挽回大局等語據稱逆首李侍賢糾合悍賊四萬於八月二十六日圍撲鎮江府城經巴棟阿督率馮子材等出城奮擊斃賊多名江面艇船亦開礮協同助剿相持三晝夜之久賊勢仍不少退等語江蘇自常昭失守以後惟有鎮江一府孤懸江岸必須竭力保全以爲進覬蘇常之地雖經巴棟阿等勉力支持無如餉絀兵單十分危急且金陵之賊亦有下窺之信甚屬可慮前閱曾國藩奏摺知該大臣刻刻以蘇常爲念鎮江儻有疏虞則江南賊勢聯成一片異日進兵更爲費手著該大臣統籌兼顧迅撥勁旅馳往援救務須設法保全是爲至要將此由六百里加緊諭令知之○諭據巴棟阿馳奏蘇常逆匪復犯鎮江官軍接仗情形並

添調兵勇協剿一摺據稱賊首李侍賢抽調蘇常悍賊於八月二十六日由辛豐丹徒而至晝夜環攻鎮江府城經巴棟阿與馮子材選派隊伍督令出擊連日斃賊不少水師船隻亦協同助剿該逆仍不肯退見在固守待援等語著巴棟阿督率馮子材嚴密防守以維大局李若珠派援之忠勇二千當已到齊並著設計進剿力卻賊氛至諫壁鎮等處賊船出港雖經參將李新明等擊退據巴棟阿片奏探聞金陵之賊尙有礮船多隻意圖下竄並下關一帶賊造長龍船僞用吳全美旗號等語逆情詭譎尤須加意嚴防著李若珠嚴飭黃彬陳國泰等統率師船併力防剿江北一帶亦須嚴爲布置毋令分竄吳全美李德麟所帶各船據楊載福奏業於八月下旬啟碇並著李若珠飛催該鎮等迅赴下游以厚兵力巴棟阿請催曾國藩統師來南之處已諭令撥軍赴援矣將此由

六百里加緊各諭令知之○大學士彭蘊章奏謝開缺調理恩得  
旨卿久在樞垣備悉時事見在夷務軍務儻有見及之處並採訪  
輿論民情仍應隨時具陳交附近地方大吏代遞○甲辰諭軍機  
大臣等據王有齡奏浙省寇氛日偪民困日深請飭派大員督師  
進剿一摺據稱浙省三次震動幸保孤城見在湖州喫緊安吉孝  
豐於潛岌岌可慮張玉良屢經挫衄銳氣全無瑞昌來存久患暑  
瘧調理需時浙省並無統兵得力大員曾國藩經營江皖有不能  
援浙之勢請飭左宗棠前來辦理江浙援剿事宜等語浙中諸將  
如道員彭斯舉總兵吳再升副將劉芳貴等尙屬敢戰必須得人  
統率方能相聯一氣前據瑞昌奏請畱張芾幫辦軍務昨張芾已  
奏明不能赴援計左宗棠此時當抵祁門著曾國藩酌量情形如  
徽甯一帶無須此軍卽令左宗棠統率所部迅由廣德前往督軍

進剿於江浙兩省軍務均有裨益將此由六百里諭令知之○命江西吉南贛甯道李瀚章幫辦團練事宜○乙巳諭內閣恭親王奕訢奏英佛兩國互換和約一摺英佛兩國業經朕派恭親王奕訢於本月十一十二等日與換和約從此永息干戈共敦和好所有和約內應行各事宜卽著通行各省督撫大吏一體按照辦理○諭軍機大臣等本日據恭親王奕訢等奏辦理英佛換約情形並自請議處各一摺據稱業已於本月十一十二等日互換和約朕閱兩國和約內雖摺內有增減大致尙無出入所請明降諭旨一條自係慎重之意本日明降諭旨一道著恭親王等宣示並交內閣發鈔定人心而杜奸謀恭親王辦理撫局本屬不易朕亦深諒苦衷自請處分之處著毋庸議另片奏俄夷照會請派大員商酌等語該夷要求本在意中所稱未了之事卽令瑞常等告以綏

芬烏蘇里等處均照奇吉闊屯之例借與居住密奏一件畱覽事  
關重大必須計出萬全方爲妥善本日英桂亦有密摺所見相同  
已令該撫至京與恭親王等面議妥協再行具奏○諭據勝保奏  
僧格林沁等所統各隊請飭分別撤回等語本日已有旨令僧格  
林沁瑞麟馳赴行在並將所統察哈爾及蒙古三盟官兵帶回遣  
撤其餘吉林黑龍江等處各軍均著歸併勝保軍營卽交該大臣  
統帶並著畱心察看其不得力者卽行撤回和約已換各省續調  
兵勇紛紛前來未免虛糜糧餉著勝保先將河南所調之勇飭令  
折回此外兵勇酌量情形具奏再降諭旨停其赴京將此由六百  
里諭令知之○諭本日據恭親王奕訢等奏英佛互換和約見在  
退兵城外僧格林沁瑞麟著卽赴行在該大臣等軍營所調察哈  
爾蒙古三盟官兵著全數帶回遣撤其餘各軍均著交勝保統帶



○諭前因英桂奏督兵赴京當經諭令該撫一人直境即可紮住聽候勝保札調再行前進其慶德一軍仍著由宣化一路赴京此際諒已接奉諭旨見在已互換和約該撫所帶官兵仍遵前旨辦理至英桂密陳一摺著卽日親赴京師與恭親王等當面密商條款再行具奏○丁未袁甲三奏定遠逆捻句結大股粵逆竄撲鳳陽府縣兩城在龍興寺九華山馬鞍山及眉山獨山等處踞險紮營三十餘座並於各要隘闌截糧道副將吳秀等激勵兵團竭力固守該逆屢次撲城均經城上礮石擊退臣又調知縣金汝霖等西路團練兩面夾擊八月二十九日穆騰阿親督馬步各隊直衝賊陣副將王才秀等首先殺入賊勢披靡山後旋又繞出賊股拒戰甚力西路練勇趕至該逆分股抵敵兵練屢次衝擊一時未能會合日暮始行收隊臣復派道員張學醇等於九月初一日夜選

帶奮勇銜枚潛至山前擁入賊營該逆猝不及防踉蹌奔逃惟時金汝霖亦至青洲營地方焚毀賊壘一座城上又連開大礮該逆棄營狂奔我軍奮勇掩殺副都統烏勒興阿克蒙額等帶領馬隊由南路鈔截於林家橋一帶殲斃淹斃難以數計查我軍自定遠撤退後布置未定該逆遽以大股圍撲鳳陽府縣兩城儻有挫失則上下千餘里防不勝防茲幸該文武等督率兵勇明攻暗襲以寡擊眾轉危爲安 上諭內閣定遠擒匪句結大股粵逆竄撲鳳陽府縣兩城副將吳秀等嚴密固守道員張學醇等乘夜往攻立解城圍該文武等督率兵練戰守不遺餘力自應立予優敘副將吳秀著以總兵記名簡放並賞加提督銜補用道張學醇著賞加堅勇巴圖魯名號並賞加按察使銜其餘在事出力人員並定遠案內存記各員均著准其彙案請獎○諭軍機大臣等據翁同書

奏粵逆大股圍攻情形緊急並都興阿已抵壽州各摺片前因夷氛逼近京都官文等請令都興阿統軍北上朕業已允其所請見在彼此罷兵該將軍見經行抵壽州卽著協同翁同書將此股粵逆擊退毋庸赴京蘇常諸賊時思北竄江北地方更爲喫緊著俟道路一通卽統帶馬步隊迅赴揚州一帶督同李若珠等嚴行防守翁同書督率諸軍連獲小勝該逆尙未遠颺著激勵將士實力防剿以保危城本日袁甲三奏稱鳳陽已經解圍派參將許保清管帶礮船駛赴懷遠遙爲壽州聲援該撫請催協餉之處已嚴諭河南及山陝兩省迅速撥解矣將此由六百里加緊各諭令知之○諭本日據翁同書奏粵逆圍攻壽州情形緊急請飭催河南等省餉銀一摺著賈臻無論何款先行籌撥數萬兩解往翁同書大營以拯危急其山西陝西二省應解壽州軍餉並著常績譚廷襄

迅卽按月撥解以濟要需將此由六百里加緊各諭令知之○署步軍統領瑞常奏洋人復擾園庭請一併治罪得旨前摺已批此次園庭被焚中營副參遊著免其再行懲處瑞常接印在初次被搶之後著加恩降四級畱任文祥慶英均不必再行議處其三山專汛都守等官著查照前批懲處○戊申諭軍機大臣等據慶端瑞璵奏蘇常嘉興尙未克復江浙兩省應運漕米能否按額運津實難豫定京倉爲積儲重地俸餉攸關自應豫籌接濟以免匱乏見在籌辦臺米明年解運京倉等語該督撫等體國之忱殊堪嘉尙江浙財賦之區多遭蹂躪本年新漕斷不能如數徵收天庾正供勢必缺額卽著慶端瑞璵督飭司道各通盤籌畫或分勸輸將或籌款採買務期多多益善於明年春夏間雇備船隻分批解運接濟京倉是爲至要將此由五百里諭令知之○諭本日據李若

珠奏江面水師大獲勝仗並克復江陰各摺片此次賊船千餘號由丹徒諫壁辛豐各口欲圖北竄經參將李新明等督軍大獲勝仗其江陰逆匪復經黃彬督令副將郭定猷等焚燒木簾杜截歸路於九月初三日將縣城克復勦辦甚爲得手軍務大有轉機惟江陰旣已克復而常熟福山常州等處皆有賊匪非有重兵駐紮萬難守禦據該提督奏鎮江業已解圍著巴棟阿卽於大營內抽出一軍飭令迅赴江陰屯守旣與鎮城互爲犄角亦可爲規復南岸地步至吳全美李德麟等師船一百八十餘號業經駛赴下游兵力已厚卽著李若珠督同黃彬飭令擇要分泊務使與南岸鎮江江陰等處陸兵互相聯絡嚴密巡防毋令賊船北竄此項水師糧餉著江清驥喬松年於南北兩臺中會同籌款放給不准互相推諉致有缺乏都興阿一軍業已行抵壽州昨諭令其統率馬步

隊馳赴江北該將軍一到軍威益振巨寇不難蕩平矣將此由六  
百里諭知巴棟阿李若珠並傳諭江清驥喬松年知之○己酉諭  
軍機大臣等據總理行營王大臣仁壽等奏請調派各衙門堂司  
各員及侍衛各項官員來赴行在並各省應解餉銀暫存直省一  
摺此次隨扈各員惟吏戶禮兵四部及理藩院內務府均有堂官  
其餘刑工兩部及大小各衙門並無堂官前來各衙門司員來者  
更屬寥寥每日應辦事件若俟回鑾後再行清理必致積壓太多  
除吏戶禮兵等各衙門均有堂官隨扈並派穆蔭兼管行在內閣  
外著派刑部左侍郎靈桂工部右侍郎宋晉理藩院尙書伊勒東  
阿都察院左副都御史聯康卽日前赴行在隨扈並將行在印信  
帶來文武大小各衙門司員經堂官派出如有推諉等情卽著嚴  
參懲辦至各省解京餉銀著戶部飭令解赴直隸省城藩庫收存

按月奏報聽候指撥卽京內兵餉等款亦著奏明由行在撥給另片奏寶鋆等籌解銀兩不力請一併交部從重治罪等語本日已據戶部奏解銀入萬兩前來寶鋆張祥河董醇均著加恩寬免再昨日朕閱戶部奏摺九月內尙有放給巡守官兵口分見在業經換約所有城內巡守官兵除應畱防守地面若干名其餘著守城巡防王大臣等分別去畱覈實支放隨時奏明以節糜費將此由六百里諭令知之○巴棟阿奏擊賊大勝李侍賢退回蘇常鎮江府城解圍命復總兵官馮子材職免其查辦○命直隸河南山東陝西各督撫迅籌欠解各項軍火兵械運交江南軍營○予湖北殉難知州楊嘉運原籍建祠○庚戌以毛鴻賓爲江蘇布政使李續宜爲安徽按察使由湖北制○予江蘇殉難知縣李淮參將周天孚等祭葬世職○辛亥諭內閣樂斌奏遵議陝省各鎮兵馬兼

歸巡撫節制一摺前因譚廷襄奏軍興以來徵調防堵多由巡撫籌辦平日無節制之權有事恐呼應不靈擬請量爲變通當經諭令樂斌會同譚廷襄妥商茲據樂斌奏擬請嗣後遇有征剿防堵要務陝西各鎮協官兵均由該撫酌調仍咨總督查照各該營訓練操防亦令該撫就近稽查儻有廢弛及缺額等弊卽行會同總督聯銜參辦其武職升遷調補稽覈糧餉等事仍由陝西提督移咨總督辦理若各鎮協將領中有人地不宜之處應令該撫咨商總督提督酌量更調等語所議尙無滯礙均著照所請行至請加提督銜之處著毋庸議○會國藩奏查甯郡失守案內臣奏明僞英王陳玉城帶大股悍賊屯踞甯國縣旋探得踞甯邑者非陳玉城乃僞侍王李侍賢也八月十八日由胡樂司竄叢山關及樓下各隘口皖南道李元度於十六日帶勇三千抵徽扼防聞警卽派



兵由績溪前進十九日出隊分路進剿一走叢山關一走樓下肅  
字營營官同知童梅華督隊猛擊賊敗該營追出關外伏賊突出  
從嶺尖翻下包鈔我後童梅華身受槍傷登時陣亡弁勇傷亡百  
餘人平字營將到樓下斃賊百餘正酣戰間聞肅字營失利而止  
是夜間道趨回賊乘勢竄過績溪張運蘭嶺外旌德之軍與李元  
度嶺內徽軍中間已被賊隔斷矣二十一日張運蘭探知大股賊  
進踞楊溪一帶派兵從中邀擊斃賊馬數十匹悍賊一千餘名賊  
紛紛潰走墜巖落澗死者無算追過板橋收隊次日仍回旌德臣  
因徽州賊勢浩大李元度兵力甚單先由祁門抽派禮字河溪各  
營二千餘人倍道馳援飭於徽城外堅築濠壘以靜制動乃李元  
度以賊偏城下逐日出隊搦戰修築不及營壘未成賊已大至二  
十四日僞侍王李侍賢同諸逆首共帶四萬人直撲徽城李元度

親督各營出城接仗眾寡不敵禮字河溪各營由西門大路退回  
休甯李元度率平江四營入城固守賊卽跟蹤圍攻西門李元度  
身卧城頭竭力堵禦二十五日申酉之間賊伏西門民房之間鑿  
牆對城施放火槍守陣弁勇站腳不住賊眾卽緣梯直上李元度  
趕調各門隊伍來救賊已四面登城而入府城遂陷迄今十日因  
賊氛阻隔尙未聞李元度下落臣自接李元度圍城中飛書求救  
卽調張運蘭由旌德入援鮑超由太平入援無如城大而圯兵勇  
僅二千有奇不敷分布又係新募之卒甫經到徽竟不能支持數  
日以待援師實堪痛惜臣調度無方咎無可辭應請旨將臣交部  
議處見在各股悍賊盤踞徽郡休甯及嶺外旌涇太石各縣有分  
竄浙江上犯祁門之意不得已檄調鮑超回駐漁亭張運蘭回駐  
黟縣以遏狂寇而定人心並咨商左宗棠迅督所部赴樂平婺源

一帶以防徽州竄江西之路俟賊勢稍定再行合力進剿 上諭  
曾國藩奏徽州失守自請議處一摺曾國藩未能先事豫防著交  
部議處仍著鮑超張運蘭等迅速進兵力圖克復闔城文武下落  
著該大臣查明具奏○諭軍機大臣等本日據樂斌奏督兵啟程  
並請卸任西甯辦事大臣暫署總督一摺據稱上次續派官兵二  
千名又飭派涼州等營官兵一千名定於九月初九日統帶啟程  
等語見在撫局漸已就緒樂斌調派之兵業經啟程者即於陝西  
境內紮住其未經啟程者即行截住毋庸前來樂斌既已起身酌  
帶官兵迅赴京師與恭親王等面商事件其總督事務即著福濟  
暫行署理提督成瑞仍畱省城幫辦營務將此由六百里加緊諭  
令知之○諭本日據曾國藩奏請於該大臣與胡林翼二人中欽  
派一人帶兵北上一摺見在撫議漸可就緒且徽甯相繼失守舒

桐方議進兵皖南北均當喫緊之時該大臣等一經北上逆匪難保不乘虛思竄擾及完善之區江西湖北極爲可虞曾國藩胡林翼均著毋庸來京至鮑超一軍諭知曾國藩飭令迅克甯郡毋庸前來該大臣見已令其回駐漁亭仍著相機前進力圖克復該大臣甫接皖南防務連失兩郡雖因餉絀兵單究屬籌畫未密著卽振作軍心再接再厲萬勿一挫之後卽損軍威李元度此次失衄殊屬可惜人才難得著卽迅速查明下落具奏將此由六百里加緊諭令知之○劉長佑奏石達開自慶遠潰往武緣餘黨數萬人分爲兩旗八月初四日竄至興安署知縣榮志與蔣顯敷率勇迎戰該匪拌死拒撲衝入縣城蔣顯敷陣亡榮志受傷墜馬爲賊擁去時副將鄢世堂等督軍疾追賊向麻子渡紅石源狂奔唐應瑞錫敬等夾擊先後殲擒數千人鄢世堂等追至道州該匪已爲楚

師所破分別剿撫殆盡振旅而還桂林全境肅清所有投誠人等  
經署鹽法道蘇鳳文等分起遣遞回籍酌畱精銳三千餘名並選  
千人隸臣楚軍以分其勢至該逆石達開及賴蘄新等擁眾數萬  
尙在武緣遣黨往攻南甯府城疊經左江道吳德徵左江鎮色克  
精阿督兵奮擊殲斃萬餘該匪復分撲遷江之良塘忻城土司之  
七峒勢已窮蹙靡騁亟應前關後躡會合埽除卽選道劉坤一久  
歷戎行素爲軍中信服臣飭令馳赴柳州大營統率全師會同總  
兵李明惠整飭部伍相機規畫一面攻取太坪蕩平南路一面分  
兵渡河由間道進屯忻城土司一帶號召慶遠思恩兩府團練進  
攻石逆以冀制其死命至興安城守營把總蔣顯敷臨陣捐軀殊  
堪憫惻應懇天恩優給卹典得旨蔣顯敷著交部從優議卹○  
壬子諭軍機大臣等據勝保奏分別畱撤官兵一摺見在各省官

兵及黃得魁等勇丁均已趕到兵勇不下一萬二千名見在足資防範安徽捻氛正熾總兵張得勝及協領恆齡所帶官兵二千數百名卽應飭令趕緊折回本日據文煜等奏濟甯被圍已派曹勇三千防勇一千隨德楞額等前往助剿河南與東境毗連尤關緊要已諭慶廉統帶兵勇迅速回省矣另片奏諸酋情願由上海助剿等語該國果有此意應俟兩國均退回天津後由恭親王等酌量辦理該大臣統帶軍旅防剿是其專責此事毋庸與聞將此由六百里諭令知之○癸丑恭親王奕訢桂良文祥奏河南捻匪肆起幾徧通省自竄擾汝甯以後賊勢益形猖獗當此多事之秋更難保不乘機北竄且直隸大名一帶壤接東豫民情素稱强悍萬一捻匪外來土匪內應直省必致震動辦理更形棘手見在大名本鎮及調防官兵僅二千餘名兵力甚單不足以資抵禦必須添

調重兵扼要嚴防並派大員統帶諸軍相機剿辦方資得力查勝保軍營共有兵勇萬餘名僧格林沁軍營約有一千餘名瑞麟軍營約有二千餘名共約有一萬數千名擬請於三營內酌撥精兵三四千名或於續調未到兵勇內截畱數千名簡派大員統帶馳往大名一帶相機剿辦以期消患未萌再風聞河間府屬之獻縣冀州所屬之衡水縣均有土匪聚集多人見已札飭直隸藩司文謙委員確查如果實有其事卽當派鎮協大員於河間一帶緊要地方防堵一面撥兵剿辦免致蔓延爲患 上諭軍機大臣等本日僧格林沁等奏遵旨撥交遣撤官兵一摺見在直隸畿南土匪竄起據文謙奏獻縣衡水武強交河一帶千百成羣肆行搶掠雖經該藩司派遣員許誦恆前往會同文煜所帶兵勇掩捕兵力太單恐不能迅速蕲事遲延日久必致愈聚愈多剿辦更爲費手大

名等處間亦有匪徒蠢動河南捻匪猖獗來去無常山東幅匪未  
清近復有捻匪大股圍困濟甯情形甚爲危急此時各省兵勇撤  
調空虛難保不乘機北竄朕思見在天氣寒冷正北方勁旅得力  
之時若能於年內將捻逆一律蕩平粵逆勢孤辦理尙可得手僧  
格林沁瑞麟均著毋庸馳赴行在卽著帶兵前往剿辦北路各匪  
先由河間一帶次及山東河南權其緩急以次進剿據僧格林沁  
等奏哲里木昭烏達兩盟及歸化城官兵尙屬得力著卽將兩盟  
官兵一千二百餘名畱於軍營其歸化城兵三百名爲數太少著  
酌量裁撤本日已諭勝保分撥吉林黑龍江等處馬隊二千數百  
名共合成四千之數歸該大臣統帶僧格林沁見爲欽差大臣俟  
到東豫時著督飭各路兵勇合力兜剿該大臣軍營兵力如有不  
敷各營均可調遣僧格林沁等惟當激勵將士力贖前愆如能迅



奏清功自當重膺懋賞朕實有厚望焉○諭朕因京南一帶土匪  
蠭起並山東河南兩省均有捻匪竄擾恐其互相勾結乘虛北犯  
本日已諭令僧格林沁瑞麟帶兵前往剿辦該大臣等所帶官兵  
除已撥交勝保軍營外兼有哲里木等盟官兵一千二百餘名其  
餘均已遣撤著勝保再於吉林黑龍江等處得力官兵馬隊撥給  
二千數百名合成四千之數交僧格林沁等統帶朕聞該夷所用  
廣匪均已由京遣散聽其自便如果屬實此項匪徒難保不聚眾  
滋事著勝保嚴密訪查如有擄掠等情立即捕拏同土匪一律懲  
辦○予天津陣亡侍衛扎精阿等祭葬世職○甲寅諭內閣前因  
給事中唐王森奏杭州北新關弊竇叢生商賈裹足等情當經諭  
令王有齡飭該關監督嚴密訪查具奏茲據王有齡奏稱北新關  
設有南北二口凡南路已經輸稅之貨行至北口若過限五日重

復徵收載在志書並非奏准定例書役往往藉此詐贓又各關口  
過往行人攜帶用物其應納稅不過三分者向准免稅其後漸有  
併計納稅之事皆由陸家埠艮山門螺螄埠草橋門等處營口家  
人及巡攔人等索詐畱難大爲行旅之害等語杭州北新關爲商  
賈往來要道稅課有常豈容胥役家丁恣意譌詐著該關監督嚴  
密稽查將過關五日十日之限一概刪除其零星貨物仍照定例  
不過三分者概予免稅以便商民經此次明定章程之後如再有  
重徵併計藉端譌索等弊除書役家人從重治罪外朕必將該監  
督嚴加懲處○乙卯諭內閣載崇奏母病未痊懇恩賞假回京醫  
治一摺載崇前因母病請假赴密雲迎親茲因母病未痊奏請續  
假自應由密雲發摺批准後再行啟身此摺係九月二十一日由  
畱京王大臣代發顯係不候批示業已回京殊屬非是載崇著開

兵部侍郎缺並撤去一切差使仍畱乾清門侍衛散秩大臣俟伊母病愈卽行前赴行在當差毋許延誤○諭軍機大臣等勝保奏東省捻氛甚熾請飭撫臣回省督剿一摺前因英佛已換和約諭令文煜在直境駐紮聽候調遣復據文煜奏稱駐富莊驛一帶會同直隸官兵掩捕土匪見在勝保恆福已各派兵前往僧格林沁等不日亦可統師南下兵力足敷剿辦皖省捻匪竄撲濟甯城圍未解正當喫緊之際著文煜統帶兵勇卽赴濟甯會同德楞額及傅振邦所派之協領恆齡等兵勇分投夾擊迅解城圍毋畱餘孽文煜到後清盛著卽行回省將此由六百里諭知文煜並傳諭清盛知之○諭劉長佑奏官軍剿賊喫緊請抵撥餉銀一摺逆匪石達開餘黨自桂林潰竄大股尙紮武緣見經該撫督飭各軍分別剿撫廣西軍務漸有起色惟據稱楚營欠餉至四十萬之多蔣益

澧一軍亦不下二十餘萬兵勇待哺嗷嗷山西陝西奏撥協餉尙欠解八萬兩道途較遠運解爲難湖北釐源豐旺請於該省應解皖餉內酌撥若干就近解濟粵西卽以山陝應解粵西之餉查明湖北酌撥銀數就近抵解皖省等語著官文胡林翼酌量情形就近抵撥用資接濟其山陝兩省應解粵餉著常績譚廷襄亦卽迅速解赴楚省以清款項將此由六百里各諭令知之○諭毓科奏江省上下游同時告警請將援浙各軍調回堵剿一摺廣東股匪周豆皮春等竄入江西樂昌等處經官軍擊退其敗匪由信豐竄至安遠意在撲城並分股回竄仁化勢尤兇悍其鄭大聲橋一股轉竄南雄裏東鳳凰橋距南安府甚近往來飄忽亟宜堵其深入之途而南贛等州縣處處與粵東毗連險隘紛岐防不勝防且水陸各軍調往堵剿者已逾萬餘粵都以北萬分空虛兼值甯國徽

州相繼淪陷饒州一帶緊接皖疆尤有脅亡齒寒之慮必須調回  
援浙各軍方足以資捍禦浙省軍務見在情形稍鬆所有江西援  
浙各軍除文瑞一軍仍畱防守省垣外著瑞昌王有齡飭令道員  
彭斯舉副將劉芳貴遊擊劉長培等各率所部營勇兼程回江援  
剿毋得稽延致誤江西全局將此由六百里諭令知之○以慶英  
爲兵部右侍郎

由內閣  
學士遷

○以安徽黟縣碧陽書院公捐軍餉永廣

學額一名○以克復廣西柳州府城賞總兵官李明惠三代一品  
封典餘升敘有差○丙辰諭軍機大臣等本日據恭親王奕訢等  
奏夷酋帶兵回津一摺此次英佛兩國雖經換約退兵恭親王等  
總須切實與之訂定不至再啟爭端至恆祺崇厚等在津撫馭夷  
人止可作爲夾訢隨員所有通商瑣屑事務由恆祺等辦理遇有  
要事仍應稟明恭親王等的辦應具奏者由恭親王等具奏恆祺

等不得具摺另奏議定俄夷條約並開單呈覽業已具悉已命軍機大臣另擬寄諭一道即可宣示○諭本日據恭親王奕訢等奏議定俄國條約開單呈覽一摺俄國使臣呈出條約十五款經恭親王令瑞常等會同該國使臣伊格那提業幅逐層商酌定議尙屬妥協卽著照所議辦理惟兩國通商往來必期永遠和睦方於兩國有益著恭親王仍飭瑞常等與該使臣言明彼此共守和約毫無疑惑卽可定期畫押蓋印以昭信義而敦和好○命武備院卿恆祺辦理海口通商事宜長蘆鹽運使崇厚以三四品京堂候補幫同辦理○丁巳諭軍機大臣等前因直東一帶土匪蠭起當諭僧格林沁瑞麟帶兵前往剿辦先由河間一帶及山東河南權其緩急以次進剿並諭知勝保撥給吉林黑龍江等處馬隊二千數百名交僧格林沁等調遣矣本日已賞給伊興額六品頂帶交

僧格林沁等差委著該大臣卽將僧格林沁分撥之吉林黑龍江馬隊一千數百名全數撥交瑞麟先行帶往河間剿辦土匪其餘再行續撥見在濟甯尙未解圍所有勝保軍營山東兵二千餘名卽著遣回交文煜統帶迅赴濟甯以資攻剿將此由六百里諭令知之○賞已革科爾沁親王僧格林沁郡王爵並還三眼花翎已革大學士瑞麟侍郎銜並還花翎○戊午諭軍機大臣等清盛奏泰克情形較緊請畱過境兵勇並抽撥駐援官兵一摺皖捻竄擾東境其勢甚張見在濟甯城圍已解逆捻大股俱在甯陽之施家集等處屯聚滋陽境內亦有賊蹤本日據杜翻奏鄆鉅單曹等縣均被竄擾自應厚集兵力以資攻剿前調赴京師各兵勇趙康侯等業經折回傳振邦所派之恆齡等馬步各隊亦經勝保飭令畱於山東助剿所有總兵張得勝管帶川楚練勇見已行抵東境著

一併畱於東省會同該省兵勇合力進剿至駐通之東省援兵二千名昨已寄諭勝保令其迅速遣回交文煜統帶矣該撫務卽會同德楞額等激勵兵勇迅掃賊氛以靖疆圉將此由六百里諭知文煜並傳諭清盛知之○山東團練大臣杜翻奏辦事顛預之濟南守汪永鏞請以同知降補得旨與撫臣文煜函商意見相同方准會銜具奏彼此不得將就含混又奏畱道員丁守存辦理沂州團練批著仍令回直該道服官直省不候諭旨因接信函擅行回東殊屬不合丁守存著交部議處又奏請飭畢承昭等辦理海防並道員陳寬就近起復又批畢承昭案關奏銷未便畱辦海防著迅卽飭令赴皖陳寬所請起復之處著吏部查議具奏○己未諭內閣順天府奏請照例賞給米石收養貧民一摺今歲近畿百姓猝遭兵燹深堪憫惻若仍照向章收養難免瑩獨無告者仍喪溝



瀆之中朕心甚爲廕念所有普濟堂一廠著如例賞小米三百石之外再行加賞小米三百石功德林一廠卽於此項小米內分給二百石以資養贍其五城粥廠亦應提早開放著五城御史認真經理毋令一夫失所並著於放飯時嚴密稽查如有匪徒涸迹卽行拏辦以副朕軫念窮黎之至意○諭軍機大臣等官文奏籲懇提兵入援京師一摺覽奏具見惻忱惟見在英佛換約定期退兵該大臣所請提兵入援之舉著毋庸前來前據曾國藩奏請帶兵入援亦因撫局就緒諭令停止其都興阿一軍行抵壽州並諭令卽赴江北毋庸北上矣至東豫一帶捻匪未能肅清見經派令僧格林沁瑞麟等督兵前往足敷剿辦惟粵逆近又竄陷徽甯勢甚披猖難保不乘虛北犯如探有內竄之信卽著該大臣帶領所派馬步隊三千餘名馳赴北路迎頭截擊毋令分竄將此由六百里

諭令知之○恭親王奕訢等奏請豫定回鑾日期待旨覽奏具見  
忱悃惟此時尙早况勝保係帶兵大員撫局亦不應干涉又奏佛  
音所要北堂可否允准批此事尙係小節既經蓋用護照亦未便  
再事爭執東北二堂究在何處速查覆奏○予通州殉難倉監督  
賈倫等祭葬世職○庚申諭軍機大臣等本日據恭親王奕訢等  
奏匪首畏罪自請效力等語據稱勝保探知河間土匪頭目王落  
越係屬匪類託名見王落越畏罪願效力自明並請解散匪眾各  
等情前據恆福奏稱匪首王落越藉團練爲名聚眾一千餘人肆  
行擄搶當諭令僧格林沁瑞麟前往剿辦先由河間一帶次及山  
東河南以次進剿見在王落越忽稱匪類託名難保非聞大兵將  
至畏罪投首惟既願效力自明如果屬實即可令其解散醜類以  
省兵力其零星匪徒搜捕亦易於蒞事著僧格林沁瑞麟詳細查

明應如何將王落越畱營效力及飭令解散匪徒不至大兵南下  
再行聚眾滋事之處悉心籌畫妥爲辦理將此由六百里諭令知  
之○恭親王奕訢等奏洋人送到刊刻通行各省條約告示請鈐  
用欽差關防由該國人等自行帶往各省交府尹督撫宣布業已  
照辦請諭沿海各督撫悉心籌辦從之○恭親王奕訢等奏洋兵  
全數退津○是月緩徵直隸磁州等十二州縣被旱被雹民旗新  
舊額賦並酌免差徭蠲緩河南鄭州等三十二州縣被擾村莊額  
賦